

კაცობრიობას. სიყვარულის მშობლური კალთა თანასწორად გახსნილია ყველასათვის: საწყალსა და დაბეჩავებულს, უქონოს და უღონოს იმდენადვე მიუწვდება მისთვის ხელი, რაოდენად მაღალსა ზედა მჯდომარესა და ძლიერებით შემოსილს; სევდიანი—დაკოდილი, სენითა და ჭირით მოცული გული იმდენ მშობლურ აღერსსა და ნუგეშს პოულობს მასში, რაოდენსაც სიციცხლით სავსე და ბედნიერებით მოთამაშე არსება.

რა იქნებოდა სიციცხლე სიყვარულის უმი-სოდ?—უშინაარსო ლანდი, ცივი გაყინული სამარე. აბა დააკვირდით თავსა! სიყვარული არ არის, რომ ამოძრავებს, ანათლებს ჩვენს ცხოვრებას? იგი არ არის წყარო, დედა, თავი და ბოლო ყველა ჩვენი სულის ძვირფას ლტოლვისა? იგი არ არის, რომ დაბადებიდანვე მჭიდროდ მიგვიყვანებს თავის ტკბილსა და მშობლურ მკერდზე და კუბოს კარამდე შეუწვევტლად და დაუღლეად გვიმღერის სიციცხლისა და ნუგეშ-იმედის ჩამბერავ ნანას?

ასეთია ბუნება სიყვარულისა, მაგრამ სულ სხვაა წესი და რიგი ცოდვისა შინა მდებარე დედამიწისა. სიყვარული სამარადისოა, სიციცხლე კი მსწრაფლ-წარმავალი, სიყვარული აღმერთებს ადამიანს, პიროვნებას—სიკვდილი ანაცარ-მტერებს მას, სიყვარული აკავშირებს,—სიკვდილი შლის და არღვევს, სიყვარული აფრთოვანებს ადამიანს,—სიკვდილი ცხარე ცრემლებით რეცხს მის დანაოჭებულ სახეს, სიყვარული სიციცხლისა და შევნიერების სხვისა ფენს ქვეყანას,—სიკვდილი სიყვარულის კუბოსამარედ ხდის მას. საწერტელი სიკვდილისა გვიწვევტს სამარადისო მშობა-ერთობის ძაფებს, თვლიდან გეტაცებს ძვირფას პირებს, თიშავს საყვარელ არსებათ და მწარე ტრაგედიით ათავებს ჩვენს სიციცხლეს, ჩვენს საყვარელ მიწწრაფებებს და წმიდა გრძნობებს. ეს მწარე ტრაგედია ფარავს ადამიანის საბედისწერო საკითხს: სიკვდილი დასძლევს თუ სიციცხლე? ნუ თუ ჩვენი წმიდა გრძნობა სიყვარულისა ცივ სამარეში სამუდამოდ ჩაიშარხება? პასუხი სიყვარულშივეა ჩამარხული. ღრმად და ნათლად

აქვს გახსნილი ეს პასუხი სიყვარულისა ერთ ჩვენ ნიჭიერ მწერალს თავის საინტერესო დრამაში: „უცარი ტალღა“... შავი ზღვის მახლობლად მდებარე ერთ-ერთ მონასტრისკენ მოეშურება ვიღაც კაბუკი. მისი თმა-აწეწილი, დაღალულ-დაქანცული სახე მოწმობს, რომ მისი გული ღრმა მწუხარებითაა მოცული. ეს არის ურწმუნო, უმადლეს სწავლა-დამთავრებული არჩილი. ვერაგ ავაზაკებმა ტყვიით განგმირეს მისი ახლად დანიშნული სიციცხლე და სატრფო ლელა, გაწყვიტეს ძაფი, რომელიც ღრმა და წრფელ სიყვარულით აერთებდა ამ ორ კეთილ და მაღალ გრძნობებით გამსჭვალულ ადამიანს. თავზარ-დაცემული არჩილი მონასტრის მოაშურებს, სადაც ბიძა მისი ექვთიმე ბერადაა შემდგარი. მოვისმინოთ სიყვარულის ხმა, დამწვარ გულიდან ამოხეთქილი. არჩილი. მაგრად ეხვევა ექვთიმეს და მწარედ ქვითინებს: „როცა ჩაქრა ჩემი კანდელი, აღარ მიწათებდა ცხოვრების გზას, სადღა წავსულიყავ!.. ვიღასთან წავსულიყავ!.. და—გზა აბნეულმა, მეხ-დაცემულივით გონება-აბნეულმა ისევ აქ მოვაშურე... რით ვინუგეშო თავი?... რიდასთვის ვიციცხლო? სად წავიდე? რა ვეძებო? რა ვაკეთო გონება არეულმა, გზა დაკარგულმა, სიციცხლე მოწამლულმა!.. ოხ, ღმერთო! ღმერთო! საიდან შემოიჭრა ჩემს ცხოვრებაში ეს უცარი ტალღა, რომელმაც მომისპო მშვიდობიანობა, დამინტერია ცხოვრების ნავი და ისე დამტოვა სახტად გაშლილ ამოხოქრებულ ზღვაში!? ეხლა სადღა ვეძებო შველა! საიღღა გავიკვლიო გზა!, ო, ლამაზო შინდორ-ველო! როგორღა დავსტკბე თქვენი მშვენებით, როცა ჩემი თვალეები აღარას დროს არ გაშრებიან ცრემლებისაგან?... ო, ცელქო ჩიტებო! როდისღა გავიგონებ თქვენს ჭიკჭიკს, როცა ჩემ გულში განუწყვეტლივ იზუზუნებს ის ტყვია, რომელმაც გაუგმირა გული ჩემს სიციცხლეს, ჩემს ნეტარებას?... ო, ო, მზეო! ველარც შენი სხივები გაათბობენ ჩემ გულს, რადგან იქ ჩაქრა ის მოგიზგიზე ცეცხლი, რომელიც შენზე მეტად მათბობდა, მახარებდა... დასკნი აუვაე-ბულო ბუნებაე! რადგან როცა გული მკვდა-

რია, შენი სიღამაზეც, შენი სიკვლეუცეც მკვდარია ჩემთვის, მკვდარია!.. სად შევღალადო ეს უსამართლობა! ვისთან ვიჩივლო, მამაო? ლელიკო! ჩემო მოწყვეტილო ვარსკვლავო, ჩამქრალო სიხარულო! წამიყვა მეც შენთან! რად დამაობლე? რად დამაობლე?.. ხუ თუ შენგან შენი სახელის მეტი აღარაფერი არ უნდა დამჩეს მე ობოლ-საბრალოს?! ო, ლელა! სადა ხარ? როგორ ვიწამო, რომ სამუდამოდ გაქრა ქვეყნიერობაზე შენი არსებობა, როგორ ვიწამო, როცა მე მხოლოდ ამ რწმენით-ღა შემძლიან ვიცოცხლო კიდევ, თუ ამის შემდეგ ჩემს სიცოცხლეს კიდევ დაერქმევა სიცოცხლე!.. არა! ლელა ისევ ცოცხალია! ის უნდა სიცოცხლობდეს სადმე!.. და თუ მე არ შემძლიან, შენ მაინც ილოცე, მამაო! შენ მაინც ილოცე და უვიწყარ ლელასთვის, კარგ ლელასთვის, საყვარელ ლელასთვის!..“ (უეცარი ტალღა ლევ. მეტრეველისა. „დროების“ დამატ. 1909 წ. № 31).

სიყვარული არ გაქრება! ბნელი სამარე ვერ შეძლებს მის დაკავებას! ამას მოწმობს სიყვარულივე და ვინ წინააღმდეგება მის ყოვლის მპყრობელ მოწმობას? ქრისტე აღსდგა! პირმშო სიცოცხლე სიყვარულის გამარჯვებისა! ვისაც გიღვივის გულში ზენარი გრძნობა წმიდა სიყვარულისა—გაიხარე! შენი სიყვარული სამუდამოა! ვისაც შეუბრალებელმა სიკვდილმა მოგტაცა სიყვარული, ბნელ საფლავში ჩაგიმარხა საყვარელი პირი,—ნუ სტირ! დღეს სიყვარულის დღესასწაულია! ქრისტე აღსდგა, და საფუძველი დაედო ყოველთა აღდგომას! სიყვარულმა გაიმარჯვა! სიყვარული საუკუნოა! რა გულით მსურს გავიმეორო სევანთა პაპების ღრმა და მაღალი საიდგომო მილოცვა: „ქრისტე აღსდგა! გიხაროდესთ, ვისაც გესმოდესთ, არა გესმოდესთ: პირსა და პირმეტყველსა, კაცსა და პირუტყვსა, ტყესა და კლდესა, ქრისტე აღსდგა, გიხაროდესთ!“

ონოფრე მწირი

„მეშვარიტად აღსდგა“

მოთხრობა

(რუსულიდან გადმოკეთებულმ).



I.

ასკალოანისკენ, ხმელთაშუა ზღვის ნაპირებს იქით წყნარი ჩაესვენა მზე, რომლის უკანასკნელი სხივები ოქროს ფრად მოეფინა იერუსალიმის კოშკებს და დაღვრემილ გოლგოთას, სადაც ამ ერთი დღის წინ გარდამობსნეს ჯვარიდგან ეკლის გვირგვინით დაგვირგვინებული მიცვალებული,

ყვითელი ფერი მოეფინა მაშინ უკანასკნელად მოწამის შუბლს; მოეფინა, გაბრწყინდა და გაქრა, როგორც უკანასკნელი ამბორი საბრალო დედისა, რომელიც უსაზღვრო სასოწარკვეთილების სიტყვებით მოეხვია შვილის დატანჯულ სხეულს:

„ვაიმე, ტკბილო იესო, ძეო ჩემო!..“

ვითარითა ხელითა შევეხო უბრწყინლსა ხორცსა შენსა?

ანუ ვითარითა არმენაკითა წარგრაგნო?

ანუ რა საგალობელი გიგალობო? ვაიმე, ტკბილო იესო!..“

და, ცდილობდა რა, რომ თავისი ხელით მოეხადა მოწამებრივ შუბლიდან ეკლის გვირგვინი, რათა მკირეოდნდ მაინც შეემსუბუქებია ტკივილი ეკლის ჩხვლეტისაგან, რომელსაც უკვე მკვდარი თავი აღარ გრძნობდა, მაგრამ რომელიც უგმირავადა მას, დედას, გულს, ის დაეცა უგრძნობლად შვილის მახლობლად, და გრძნობაში მოვიდა მხოლოდ მაშინ, როდესაც იქ გარეშემო მდგომარე და გულ ამოსკვნით მტირალე დედებმა ჯვარცმულის მოწამის იოანეს დახმარებით აიყვანეს იგი ხელით და მიიყვანეს უბრალო პატარა სახლში, სადაც ის რამოდენიმე დღის წინათ მივიდა პასექის შესაგებებლად.

მზე თანტან ეშვებოდა ღ ბინდმა მოიკცა არე მარე,— და მალე მთელი ბუნება სიბნელეში გაეხვია. დაღვრემილი გოლგოთა, გეთსამანიის ბაღი, მღუმარე ციხე და მთელი დიდი ქალაქი,— ყველაფერი მღუმარე ღამის ბნელ უფსკრულით დაიფარა, სანამ, დაბოლოს, ცის კიდეში მთვა-

რემ არ ამოაშუქა და თავის საიდუმლოებით მოკულ შკრთალი სხივებით არ გაანათლა საშინელი შემთხვევის ადგილი.

გოლგოთაზე აღარავინ იყო, და მხოლოდ მთვარე ცის კამარიდან დაყურებდა ჯვრებს და ახალ საფლავს, რომელზედაც დაედვათ დიდი ლოდი და პილატეს ბეკდით დაებეჭდათ და რომლის მახლობლად იარაღით ხელში ისხდნენ რამოდენიმე რომაელი დარაჯნი, დაყენებულნი საფლავის დასაცველად. იერუსალიმშიაც ყველაფერი დამშვიდებული იყო. ანა და კაიაფა უზრუნველად განისვენებდნენ სიონის სასახლეში, თითქო იმათ ერთი დღის წინეთ არ აეყენათ ქვეყნისაგან ეს მართალი, თითქო არა იმათ ამოეგლიჯოს გული საცოდავ დედისა, თითქო იმათ არ დაედვათ ხალხის მხარზე მძიმე ტვირთი ცოდვებისა, მლაღადებელი სისხლისაგან მართლისა.

მთვარე მედიდურათ და დამშვიდებით მიკურავდა ლურჯად მოკრიალებულ ცაზე და, როგორც ლამპარი კაცობრიობის საფლავზე, ანათებდა სამარისებურ სიბნელეს, რომლითაც დაფარული იყო დედამიწა.

II.

იმ შაბათის შემდგომ ღამეს იოანე, რომელსაც იესომ ჯვარზე მყოფობის დროს მიანდო ზრუნვა თავის დედაზე, უნდა წასულიყო კლეოპას სახლში, სადაც ქრისტეს ყველა მოწაფენი შეკრიბილიყვნენ. მარიამი დარჩა მარტო. სახლი, რომელშიაც ის იდგა, შედგებოდა ოთხი ოთახისაგან და ერთი სრული სადგომისაგან, საიდანაც ცალკე-ცალკე ყველა ოთახებში გადიოდა კარები.

ერთ ოთახის კუთხეში, სამუხეზე იდგა ლამპარი, მეორე კუთხეში მის პირდაპირ იდგა განმზადებული ლოგინი, ხოლო მის მახლობლად ერთი სტოლი და ერთი სკამი. სტოლზე იდგა ებრაელების კანონების, წიგნი გაშლილი თორა; სტოლზემოდ კედელზე ეკიდა ორი პირსახოცი; ხოლო ოთახის ყველა კედლებზე გარშემო მიდგმული იყო ტახტები, ნოხებით დაფენილნი. ოთახს მჭირდა ორი ფანჯარა ხის ჩაჩოვებით

და ორივე გეთსამანიის ბალისკენ იყო მოთავსებული.

იესო ყოველთვის ამ ოთახში ცხოვრობდა, როცა ის იერუსალიმში მიდიოდა პასექის დღესასწაულის დროს. იმავე სახლის მეორე ოთახში ცხოვრობდა მარიამიც. და აი იმ ღამეს ის თავის ოთახში სრულიად მარტოდ-მარტო დარჩა. დედანი, რომელთაც წინა-ღამე მასთან გაატარეს, წავიდნენ თავ თავის სახლებში და ახლა ამ სახლში მარიამის გარდა სხვა არავინ არ იყო. დაღლილ-დაქანცულობით და მეტისმეტი სულიერი ტანჯვით ღონემიხდილი, ის იჯდა თავის ლოგინზე, მუხლებზე ხელები დაეწყო და ხანდახან ნელის ხმით წამოილაპარაკებდა იესოს წვალეზაზე. ალერსით სავსე სიტყვები, რომელთაც ღრმა მწუხრებაში მყოფი საბრალო დედა წარმოსთქვამდა ღამის მყუდროებაში, უერთდებოდნენ შუალამის ნიაფით ამოძრავებულ ხეების ტოტების და ფორთლუბის ნელ შრალს.

ნამდვილი შუალამის დროს, როცა უკვე მთელი ბუნება უშფოთველ ძილს მისცემოდა, და ძაღლის ყეფაც კი არსაიდან ისმოდა,—ის შეკრთა; მას მოეჩვენა, რაღაც კარების ახლო გახმაურდა. მან მიიხედა იქითკენ და სმენად გარდაიქცა, მაგრამ ყველგან გარშემო დიდი მყუდროება სუფევდა. მხოლოდ მთვარე ხეების ტოტებთ შუა თავის მოყვითალო ფერით გამოიყურებოდა და ფერმკრთალად ანათებდა იატაკს და ლოგინს, რომელზედაც მარიამი იჯდა.

ბოლოს ის ადგა ლოგინიდან, გააღო კარები და გაემართა ქრისტეს ოთახისაკენ. როცა მივიდა ქრისტეს ოთახის კარებთან, სული შეიგუბა, კარებს ყური მიადგა და ყურის გდება დაიწყო. ის ვერც იქცეოდა ყოველ ღამეს, როცა ძე მისი იქ იყო. მაშინ ის ფეხ-აკრეფით მიდიოდა ხოლმე, მიყურებდა და, რაკი გაიგონებდა მძინარის მშვიდ სულისთქმას, ფეხ-აკრეფითვე გამობრუნდებოდა თავის ოთახში, რომ ცოტათი თითონაც მოესვენა. ის ახლაც ვერც მოიქცა. მაგრამ რისთვის?... ახლა ხომ იესო ოთახში არ იყო... ათრთოლებული ხელით შეაღო კარები და ოთახში შეიხედა. იქ

ყველაფერი მდუმარება. ლამპრის მკრთალი სინათლე შეშინებულსავეთ კრთოდა. დაბალ ქერზე ირხეოდნენ ფანჯრის წინ ამოსული. მთვარის სინათლით განათებული ხეების ტოტების ჩრდილნი. ის შევიდა ოთახში.

თითოეული კუთხე, თითოეული მცირე ადგილი ამ ოთახისა მოაგონებდა მას იესო ქრისტეს. აი ის კუთხე, რომელშიაც იესო დიდი ხნობით დაჩოქილი იდგა დილის და საღამოს ლოცვის შესრულების დროს და გამოითხოვდა თავის მამისაგან კაცობრიობის ცოდვების მოტევენას.

მარიამი ათრთოლდა, დაეარდა შეილის ლოგინზე და დაიწყო მწარეთ ტირილი და გოდება.

— შენ რისთვის გაცვეს ჯვარს?! ზეციერო მართალო! მეც რისთვის თან არ წამიყვანე?!..

მარიამი ცოტათი ღამში დედა, დაეშვა ლოგინზე და მიეცა ღრმა ფიქრებს. მას არ უხილავს თავის თვალთ, როგორ ეამბორა იესოს იუდა და მისცა ის ჯალათებს ხელში, არ დასწრებია ის მაშინაც, როცა იესოს დაადგეს თავზე ეკლის გვირგვინი და შემოსეს მას ძოწეული, არ უხილავს მას არც ის, თუ ბრბო როგორ იყრიდა მუხლს მის წინ, დასცინოდა და ეტყოდა: „გიხაროდენ, მეუფეო ურიათაო!“

ღიახ, ესენი მას არ უნახავს,— მაგრამ მან ნახა ჯვარზე ტანჯვა იესოსი, და ეს მეტად დიდი ტანჯვა იყო დედის გულისთვის, მაშინ მახვილმა განვლო მის გულში. გულკეთილნი დედანი თავიანთ ტანისამოსის სახელოებს აფარებდნენ მას თვალებზე, რომ არ დაენახა როგორ დააწვინეს იესო ჯვარზე, როგორ მიჰქედეს ის ლურსმნებით ჯვარზე, — მაგრამ ჩაქუჩის დაკვრის ყრუ ხმა ცხადად ესმოდა და საბრალო დედას მეტად ძლიერ უგმირავდა გულს. მან დაინახა ის ჯვარზე თავდახრილი, ღია თვალებით და ეკლის გვირგვინით, რომლის ქვეშ ერთი მეორის შემდგომ მოგორავდნენ სისხლის მსხვილი წვეთები. ღიახ, ეს იხილა საბრალო დედამ და გულშეწუებული მოეხვია ჯვარს.

ხოლო ის?... ის ითმენდა, ითმენდა ყვრი-მალში ცემასაც, კიცხვასაც, გინებასაც; მოწყალე თვალთ უყურებდა თავის მკვლევებს, და, როცა ისინი სიცილ-ხარხარით ყვიროდნენ: „თუ შენ ძე ღვთისა ხარ, მოახდინე სასწაული და ჩამოდი ჯვართვან!“ — მან აღაპყრო თვალნი ზეცას და ვედრების ხმით წარმოსთქვა: „მამაო, მიუტევე მათ, რადგანაც არ იციან, რას შერებია!“ ოხ! ის ეკლის გვირგვინი! ის ეკლის გვირგვინი! ოხ! რატომ მან არ მოხადა ის თუნდ მაშინ მაინც, როცა ის ჯვარიდგან გადმოხსნეს!.. ოხ! რა სატანჯველს გამოივლიდა ის!..

და, იჯდა რა შეილის ლოგინზე გულზე ხელზე დაკრებილი, მარიამი ტანჯვით ფიქრობდა ამეებზე. ანძრევდა თავის დალილ თავს და ცრემლებს აფრქვევდა თვალთაგან.

საშინელი გოლგოთა სამუდამოთ მის ფიქრებში ჩაქსოვილიყო.

ერთი მეორის შემდგომ აგონდებოდა მარიამს თვითოეული წამი ჯვართან გატარებული და თვითოეული წამი დატანჯულ-დაქანცულ მის სულს მძიმე ლოდით ეცემოდა. თვითოეული წამი მისთვის ახალი გოლგოთა იყო. ამ აზრების სიმძიმემ მოხარა მისი დაღლილი სხეული; ძლიერ დაღლილობის და დიდი ხნის უძილობისა გამო მას თვალები ეხუჭებოდა და ძილი შეუძნეველად მოერია.

III.

არ გასულა რაოდენიმე წამი და მარიამს უცბათ გაეღვიძა და გაკვირვებით დაიწყო ოთახის თვალიერება. მთვარის სინათლე ხეებს შუა თან-და-თან ქრებოდა, ხოლო ქერზე ხეების ტოტების და ფოთლების ჩრდილნი ერთი მეორის შემდეგ იკარგებოდნენ. ოთახში სრული მყუდროება სუფევდა, არაფერი არ ისმოდა, გარდა ჩამწვარ სანათის სუსტი ტკაცანისა, — სანათის, რომელიც ცის კამარაზე მყოფ ვარსკვლავის კრთომას მოგაგონებდა და ძლიერ თავის გარშემო ანათებდა. მას მოეჩვენა, ვითომც მის მახლობლად გაიშრილა თეთრმა კვართმა (პერანგმა) და მერმე ეს კვართი მეორე კუთხისაკენ წავიდა.

მარიაში შეკრთა, რაღაცა მოულოდნელმა შიშმა შეიპყრო ის და რაღაც გამოურკვეველ მოლოდინში მყოფი ლოგინიდან გადმოვიდა, აიღო ლამპარი და ოთახის თითოეული კუთხე მიიარ-მოიარა და დაათვალიერა; რადგანაც ვერაფერი ნახა, გააღო კარები და სხვა ოთახებშიაც შეიხედა. ლამპარს სიბნელეში ლაპლაპი გაჰქანდა, ხოლო დაღვრემილ ღამის ჩრდილს ოთახები მოეცვა და ლამპარის სინათლეზე ქრებოდა, მაგრამ როცა მარიაში ლამპარს მეორე კუთხისკენ წაიღებდა, კედლებს ისევ ჩრდილი ეფინებოდა...

მარიაში, რაკი ვერაფერი ნახა, ისევ დაბრუნდა იესოს ოთახში, ლამპარი თავის ადგილას დადგა და ისევ ლოგინზე ჩამოჯდა. დადლილს, სულით დაქანცულს ძილი ერეოდა. თავში ირეოდნენ და ქრებოდნენ ფიქრები; მის მახლობლად რაღაც ხმაურობა გაისმა; თვალის ქუთუთოები დაეხუჭა მაგრამ, სანამ ღრმა ძილს მიეცემოდა, კიდევ მოეჩვენა, რომ ოთახში ვიღაც დადიოდა. ერთი წამის შემდგომ მან იგრძნო, რომ ვიღაც მისი პირის სახისკენ გადმოიხარა და გარკვევით სუნთქავდა. მან მოინდომა თვლების გახელა, მაგრამ თვლების ქუთუთოები ტყვისავით დაშიშვებულიყვნენ და თვლები ვერ გაახილა; მოინდომა ამდგარიყო, მაგრამ დადლილ-დაქანცული სხეული არ ემორჩილებოდა, და ის ისევ უძრავად მწოლარე და თვლები დახუჭული დარჩა.

უეცრად მარიაში იგრძნო თავის შუბლზე მხურვალე ამბორი და სწრაფად წამოდგა ლოგინიდან. მისი გული აჩქარებით ძვრდა.

თვით ლოგინთან იდგა ის, ვიზებად მარიაში ვერე რიგად სწუხდა. ფერ მკრთალი, ნაწამები, მაგრამ ზეციური ნათლით გასხივოსნებული, ის, დამშვიდებული, ალერსით უცქერდა. მას თავზე კიდევ ედგა ეკლის გვირგვინი, ხოლო პირი სახეზე კიდევ აჩნდა სისხლის წვეთების ჩამონადენი კვალი. ხელებზე და ფეხებზე მოჩანდნენ ღრმა კრილობანი.

— შეილო ჩემო! წამოიძახა მარიაში და გაშალა ხელები მოსახვევად.

— დედა კაცო! ნუ სტირ! — უთხრა მარიამს იესომ, — ძე შენი აღსდგა საფლავით.

— შეილო ჩემო! მხსენელო ჩემო! კვლავ ნულარ დამტოვებ — ევედრებოდა დედა და მოეხვია მუხლებზე.

— ჯერ კიდევ არ შეიძლება შენი წამოსვლა იქ, სადაც მე მივდივარ. — მიუგო მან, ფრთხილად მოიშორა მუხლებიდან მისი ხელები და კარებისკენ წავიდა.

— არა, არა. ოხ! კიდევ თუნდ ცოტა ხანს... მოიცადე, ძეო ჩემო საყვარელო!... მე მინდოდა შენთვის... ევედრებოდა ის და უცქეროდა შუბლზე.

იესო გაჩერდა.

— ჰო, წარმოსთქვა მარიაში, — განა შენ არ გხვლეთ და არ გიძრავს ტკივილს ეს ეკლის გვირგვინი? ძეო ჩემო! სიხარულო ჩემო! ნება მომეცი დედა შენს შევიმსუბუქო ტანჯვანი შენნი... და მან ორივე ხელი გაიშვირა, რომ მოეხადა მისთვის მოწამებრივი გვირგვინი.

— არ შეეხო მას, — უთხრა იესომ. — ეს არის საჩუქარი, რომლითაც დედამიწამ დააგვირგვინა საქმენი მართლისა. მე ის უნდა მიუტანო ღმერთს, მამა ჩემს... დედა დაეცა მის წინ მუხლებზე, შეხედა მას უკანასკნელად — და მკვდრეთით აღდგომილი მიეფარა — უხილავი შეიქნა.

IV

მოისმა კარებზე ძლიერი რახუნი.

— გაგვიღე კარი!

ესენი იყვნენ მენელსაცხებლენი დედანი, რომელნიც ამ ღამის გათენებისას უნდა წასულიყვნენ საფლავზე, რათა ეცხოთ ნელსაცხებელი დასაფლავებულის სხეულისათვის.

— გაგვიღე კარი! იძახოდნენ ისინი.

მარიაში მივარდა კარებს და გააღო.

მენელსაცხებლენი დედანი შეშფოთებულნი, შეშინებულნი საჩქაროდ შემოვიდნენ ოთახში.

— იჩქარე, — უთხრეს მარიამს, — საფლავზე სასწაული მოხდა...

— რა სასწაული?! შეეკითხა მარიაში.

დარაჯნი, რომელნიც შეშინებულნი მირ-

ბოდენ საფლავიდგან, ამბობდნენ, რომ ძე შენი—ქრისტე აღსდგა.

— ქექმარიტად აღსდგა!—მიუგო მარიაშმა.
არქ. ნესტორისა.

აღდგომა.

შუალამია, ზეცაში
ანგელოსთ სიხარულია,
ცა მოკაშკაშე ვარსკვლავით
მოქედლილ-მოქარგულია.

აღმოსავლეთით კაბადონს
აშვენებს შუქი ნათლისა,
ციმციმ—კაშკაშით მოცეცქობს
ვარსკვლავი განთიადისა.

მზე ამობრწყინდა დიდებით,
სხივები სტყორცნა ბუნებას,
ოქროს ისრებსა სროლილობს,
ამკობს ღვთის ყოველ ქმნილებას.

— ზეცის მნათობნო, გვიამბეთ:

რისგან-ა გამოწვეული
თქვენი დიდებით მოსილი
საერთო ღღესასწაული?

— საერთო გამოძახილი

მოისმა: **ქრისტე აღდგაო!**
დაიმსხვრა რკინის ბორკილი,
მონობის ჯაჭვი გაწყდაო!

— პირქვე დაემხო სატანა,
ეშმაკი აებარგაო,
ჯოჯობნეს ბნელი ძალები
დაერღვა, დაეკარგაო!...

ღღესასწაულობს ბუნება,
მთები—მთებს ეხმაურება;

ქრისტე აღსდგაო— გასძახის,
დასტკბესო ქვეყნიერება!

გუნდი და გუნდი მფრინველთა
ტკბილ ხმა-მწყობრითა გალობენ,
ბულბული ქარგავს ყველას ხმებს,
ყველა კი, ზეცას მადლობენ.

სულიერი და უსულო
გასძახის: **ქრისტე აღსდგაო!**
პირქვე დაემხო სატანა,
მონობა დაიკარგაო.

ის აღსდგა, ჩვენც აღვადგინა,
ვმადლობთ, ფეხთ ვკოცნით, ვემთხვევით,
მაგრამ რა! ჩვენ მაინც ვმრუდობთ,
არ ვდგებით, პირქვე ვემხობით.

•
კაცი რომ აღარ მრუდობდეს,
ნეტავი ის დრო დადგება?
ან კიდევ: ქრისტე ხომ აღსდგა,
ჩვენთვის მეორეთ აღსდგება?!

რ. საჯავახოელი.

ქრისტიანული სიყვარულის შესახებ.

„ამით ჰსენან ყოველთა, ვითარმედ ჩემნი
მოწაფენი ხართ, უკეთუ იყვარებოდეთ ურ-
თიერთ არს“ (იოან. XIII 36)

ცხრამეტი საუკუნე შესრულდა, რაც ეს
დიდ მნიშვნელოვანი სიტყვები წარმოსთქვა
იესო ქრისტემ. პირველად ეს სიტყვები მოცი-
ქულების მიმართ იყო მიმართული. მოციქუ-
ლებმა თანახმად მოძღვრის სურვილისა იწყეს
ქადაგება მთელს მაშინდელ რომის იმპერიაში
და მით ნათელ ჰყვეს, რომ ისინი ქრისტეს
მოძღვრების ნამდვილნი მიმდევარნი იყვნენ.
ადვილი წარმოსადგენია ის დამცირება, დევნა
და წვალება, რომელნიც განიცადეს მოციქუ-
ლებმა წარმართ უღმობელ ხელთაგან. მთელი
მაშინდელი რომის იმპერია უზნეობის მორვე-
ში დასტურავდა (რომ. I, 21,—32), მთელი
კაცობრიობის ავლა-დიდება უმცირესობის ხელთ
იყო, უმრავლესობა კი მისს გაუმადლარ გულის
გასართობი სათამაშო ნივთი იყო. ადამიანი ნამ-
დვილად ველურ მხეცს დამზგავსებულყო, სი-
ყვარული მოყვასისადმი სრულიად არ იყო. აი
ასეთ დროს მოციქულები, გამსქვალულნი თვის
მოძღვრის დარიგებით, ყოველგან და ყოველ-
თვის უშიშრად მოუწოდებენ წარმართ (ურწმუ-
ნთ) უკუაგდონ შური, მტრობა, წინანდელი
ველური ცხოვრება და ერთი მეორესადმი სი-
ყვარულით გაიმსქვალონ. მოციქულები ქადა-
გობდნენ, რომ ადამიანთა შორის გარჩევა არ
უნდა იყოს, ადამიანი შექმნილია „ხატად და
მსგავსად ღვთისა“. ქრისტე მოვიდა ქვეყნად
და ჯვარს ეცვა მთელი კაცობრიობისათვის.

მისთვის ერთია მდიდარი, გინა ღარიბი, წარჩინებული, გინა დასკირებული, „წარმართი, ურია, წინა-დაცვეთილი, გინა წინა-დაუცვეთელი, სკვითი, გინა“... (კოლ. III, 11). ყველა ესენი ადამიანებია და ამიტომ მათ შორის სიყვარული უნდა მეფობდეს და არა სიძულვილი. თითონ პირველმა ქრისტიანებმა ნათელ-ჰყვეს ის, რასაც მოციქულები ქადაგობდნენ. მათ შეიყვარეს მოყვასი თვისი, როგორც თავი თვისი. სულიერი მოთხოვნილება ხორციელზე მალლა დააყენეს. „ყოველნივე მორწმუნენი“ იყვნენ ერთბაშად, და აქვდა ყოველივე ზოგად და დაბნებსა და მონაგებსა განყიდდეს და განუყოფდეს მას ყოველთა, ვითარცა ვის რა უხმდა.“ (საქ. მოციქ. II, 44—45). იქონია რაიმე გავლენა მოციქულების სიყვარულზე ქადაგებამ და პირველ ქრისტიანეთა სიყვარულით გამსჭვალულმა ცხოვრებამ, მოახდინა რაიმე ცვლილება წარმართ კერძო, საზოგადოებრივ და სახელმწიფოებრივ ცხოვრებაში? ამას მტკიცებაც არ უნდა. ვინც ცოტათი მაინც გაცნობია საეკლესიო ისტორიას, ის დარწმუნდებოდა, რომ ქრისტიანულ სიყვარულზე ქადაგების ნაყოფი დიდი იყო. საშინელის სისწრაფით, როგორც ელვა-მოელვა მოციქულების ქადაგება მთელ ქვეყანას, მზის შუქივით შეანათა ცხოველ-მყოფელმა ქრისტიანულმა სიყვარულმა დაბნელებულ წარმართ ცხოვრებაში და, როგორც მეხი, დაამტვრია და გაანადგურა მათი სათაყვანებელი კერპები. ასეთია ძალა ძლევაშოსილ ქრისტიანულ სიყვარულისა.

მოციქულებმა ჩვენ ვადმოგვცა ქრისტეს სწავლა. მივიღეთ ჩვენ ქრისტეს მოძღვრება? მიღებით კი მივიღეთ, მაგრამ ჩვენდა სავალალოდ და დიდად საუბედუროთ კი არ ვასრულებთ. ასრულებას ვინ ჩავის, აღარც სურვილი გვაქვს მისი აღსრულებისა, ისე გაიტაცა ჩვენი არსება მიწიერმა ინტერესებმა, ისე ჩანთქა ამ ქვეყნის წარმავალმა გრძნობებმა უუმაღლესი მცნება ქრისტესი, რომელიც წარუვალი და მარადისია.

შეიძლება საშუალება არ გვქონდა, ძალა არ შეგვწყვედა მის აღსასრულებლოდ?

მიმოვიხედოთ ჩვენს გარშემო, თვალი გადავავლოთ იმ სიმდიდრეს, რაც ჩვენ ხელთ გვაქვს. რა გვაკლია? მგონია, რომ ერთის მეტი—გარდა მოყვასისადმი სიყვარულისა—არაფერი არ გვაკლია. რა დარჩა ადამიანს დაუმორჩილებელი? წინეთ წარმოდგენაც არ ჰქონდათ ჩვენ წინაპრებს. ეხლა კი ადამიანმა თვის ჭკუა-გონების საშუალებით მიწაშიაც ჩაიხედა და ყველაფერი გაიგო, თუ როგორი ნიდაგია რამოდენიმე ათი ვერსის სიღრმეში. დედამიწა კიდი კიდემდე მოვლო. გამოიგონა ორთქლმავალი, დააგო რკინის ლიანდაგები და მით ერთი ქვეყნიდგან მეორე ქვეყანას გადასვლა გააადვილა. გამოიგონა ელექტრონი და მისი ძალით მალალ მთებზედაც კი ადის. დაიმორჩილა წყალიც. ეს თვალ-უწვდენელი ზღვები, რომელთა უღომბელ ტალღებს ბევრი ადამიანი უმსხვერპლია, დღეს ადამიანის მონამორჩილად გამხდარა. წინათ ზღვის დანახვა თუ შიშის ზარსა ჰგვრიდა ადამიანს, დღეს თავისუფლად შეიძლება ოკეანეშიაც გემებით მოგზაურობა. ამ ბოლო დროს ადამიანი ჰაერსაც იმორჩილებს. —ერთი სიტყვით, ადამიანი არაფერს არ სტოვებს გაუგებარს ქვეყანაზე. ასეთმა აღმოჩენებმა, ასეთმა კულტურამ ადამიანს ბედნიერება არ უნდა მიანიჭოს? როგორ სურათსა ვხედავთ? ბედნიერება აკრძალული ხილია, უბედურება კი თან-და-თან ფესვებს იღვამს. არ იქნა ვერ დამყარდა კაცთა შორის ბედნიერება, არ იქნა ვერ ამოისუნთქა თავისუფლად ადამიანმა. მერე ვინ არის დანაშაული? ჩვენდა საუბედუროთ ისევ ჩვენა ვართ. თავმოყვარეობამ შებოჭა მთელი ჩვენი არსება. ეგოიზმი უღომბელი მტერია ქვეშაირთ სიყვარულისა; ეგოიზმი მთელი კაცობრიობის დამამკირებელია. ადამიანს, რომელიც „ხატად და მსგავსად ღვთისა“ შექმნილია, ეგოიზმი პირუტყვს უთანასწორობს. ამ უღომბელი სენითაა შეპყრობილი ჩვენი ოჯახი და საზოგადოება. შეიღებები მშობლებს არ ემორჩილებიან; ეგოისტურ ინტერესებით შეპყრობილი მხოლოდ-და თავის თავზედა ფიქრობენ. მოციქულის დარიგებანი დავიწყებულია (ეფეს. VI, 1—5),

რასაკვირველია, ასეთ წვერთაგან შემდგარი საზოგადოება ვერ იქნება უნაკლო. აქაც გვარი-შვილობას, ჩამომავლობას, შენ-ჩემობას ფესვები მაგრად გაუდგამს. ერთმანეთისადმი შური, კინკლაობა, დაბეზღება ჩვეულებრივ მოვლენად გადაქცეულა. გინდა რაიმეს გაკეთება, რომელსაც ნამდვილი ქრისტიანული ხასიათი აქვს, ათასი დამაბრკოლებელი მიზეზები გელაბება წინ, რომელთა მიწიერი ხასიათი აქვს. რამდენი ღარიბები, რამდენი „ლაზარენი“ გამოუგდია ეგოისტურ ცხოვრებას გარეთ! ველარც „ნამუსრვეისაგან, გარდმოცივებულისა ტაბლისაგან მდიდრისა“, იკვებება, რომ ამ ქვეყნად ცხოვრება შესძლოს. „შეიყვარე მოყვასი შენი, როგორც თავი შენი“ — სთქვა ქრისტემ. ჩვენ კი ჩვენთვის ყველაფერი გვიანდა, ჩვენი მოყვასისათვის კი არაფერი. ასეთია ჩვენი ცხოვრების სურათი.

ჩვენ კი ვამბობთ, რომ განათლებულ დროში ვსცხოვრობთ. ჩვენი თავი შეგნებულად მიგვაჩნია. მაგრამ ის რა განათლებაა, თუ არა გაუნათლებლობა, ის რა შეგნებაა, თუ არა შეუგნებლობა, თუ ბოროტება იმარჯვებს, თუ ჩვენი ყოფა-ცხოვრება ბოროტებაზე აგებულია.

ყურადღება მივაქციოთ, თუ რა შეუძლია ქეშმარიტ სიყვარულს. იესო ქრისტე მთელი კაცობრივობისათვის ჯვარს ეცვა. განა შეიძლება მისი აღწერა და დაწვრილებით წარმოდგენა, რაც მან ჩვენთვის დამცირება, წვალება განიცადა? აი რას მოგვითხრობენ მოციქულები: „განჰსძარცვეს იგი და ქლამინდი მეწამული შეჰმოსეს მას და შეჰსთხზეს გვირგვინი ეკალთაგან, და დაადგეს თავსა მისსა, და ლელწამი მიჰსცეს მარჯვენსა ხელსა მისსა... და ჰნერწვიდეს მას, და მოიღეს ლელწამი, დაჰსცემდეს თავსა მისსა... და რომელნიმე ყვრი-მალსა ჰსცემდეს... დასდვენ მას ჭედა ჯვარი (რომელზედაც ის უნდა გაეკრათ), მიიყვანეს ადგილსა მას, რომელსა ჰრქვიან თხემისა ადგილი, და მუნ ჯვარს აცვენს იგი (მათ. XXVII, 28-30, 39, XXVI, 67, ლუკ. XXIII, 26). — სრულიად უღანაშაულოდ დაინთხა გოლგოთას მთაზედ ქრისტეს უმანკო სისხლი. ამისდა მიუხედა-

ვად იესო ქრისტემ კაცობრივობა მიიწი არ დაივიწყა. ჯვარზედ გაკრული კაცობრივობისათვის ლოცულობდა: „მამაჲ! მიუტევე ამათ, რამეთუ არა იციან, რასა იქმან (ლუკ. XXIII, 34). აი რა შეუძლია სიყვარულს ქეშმარიტს, უმწიკვლოს და უანგაროს.

თუ ქრისტემ ჩვენ ასე შეგვიყვარა, ჩვენც უნდა გვიყვარდეს ის. მისი მცნება: „ამით ჰსცნან ყოველთა, ვითარმედ ჩემნი მოწაფენი ხართ, უკეთუ იყუარებოდეთ ურთიერთას“ — უნდა დაედვას საფუძვლად ყოველივე ჩვენ მოქმედებას. არავითარმა ამ ქვეყნიერმა ინტერესებმა არ უნდა დაგვაიწყოს ის. ადამიანი პირუტყვი ხომ არაა, რომ მხოლოდ მიწიერ ინტერესებით იყოს გამსჭვალული, მისი უღარესობა სხვა ქმნილებასთან შედარებით იმაში გამოიხატება, რომ მასში სცხოვრებს სული უკვდავი. მაშ, ხორციელ ინტერესებს გარდა, მას სულიერიც აინტერესებს. უკანასკნელი ხორციელზე მაღლა უნდა იქნას დაყენებული, თორემ ჩვენს და პირუტყვს შუა არავითარი გარჩევა არ იქნება. ყოველივე ხორციელ მოთხოვნილებათა დაკმაყოფილება ადამიანს ადამიანობას დაუკარგავს, ეგოიზმს გაამეფებს და სიყვარულს მოყვასისადმი ჩაჩრდილავს. ადამიანი მხოლოდ მაშინ აღასრულებს თვის დანიშნულებას, როცა ის მოყვასისადმი სიყვარულით გაიმსჭვალება. მხოლოდ სიყვარულით გამსჭვალული ადამიანია. სრული ადამიანი. სიყვარული ამორებს ადამიანს დედა-მიწას და აღჰყავს ის მაღლა-მაღლა — ცამდე. „სიყვარული აერთებს ცასა და დედამიწას.

მაშ ქრისტიანენო! შევიგნოთ ძალა ქრისტიანულ სიყვარულისა. გავიმსჭვალათ მისი ძლევა — მოსილობითა. ნამდვილი ბედნიერება მხოლოდ მაშინ დამყარდება, როცა ჩვენი ეგოიზმით გაყდენილი გული დაივიწყებს შურს, მტრობას, ამპარტავნებას და შუქ-მფინარე სი-ცოცხლის და სიკეთის სიყვარულის მზის ქვეშ განისვენებს. როგორც მზის სხივების გავლენით ჰქრება ნისლი და ჰაერი იწმინდება, ისე ქრისტიანული სიყვარული გაჰფანტავს ჩვენი გუ-

ლიდგან ყოველივე ბოროტებას და „დაჩაგრულებს ამ ქვეყნისას“ შეგვაყვარებს. მაშ ვეცადოთ ქრისტეს მცნების აღსრულებ-

ბას. მხოლოდ მისი აღსრულებით შევიქნებით ნამდვილი ქრისტიანები.

ფილიპე სირაძე.

რაფაელის სურათის „მადონა“-ს წინ.

შთაბეჭდილება.

(გუძღვნი ძვირფას მამულიშვილს ეპისკოპოსს ლეონიდს).

ნუ სტირ მადონა, ნუ ღვრი ცხარე ცრემლთ!
 ნუ გეშინია, მოიუც გული!
 ჯერ არ მოსულა შენი იესოს
 ჟამი წამების და აღსასრული.

* *

ნუ სტირ მადონა! გულს ნუ ჩაკერავს
 ქვეყნისა მხსნელი ნაზარეველი!
 ჩვენთვის იშვა და ჩვენივე ხსნისთვის,
 ჯვარსე გაეკვრის... შეუღრეკელი!

* *

ნუ სტირ! სტიროდეს მხოლოდ ის დედა,
 რომელიც შობს შვილს უქმსა ქვეყნისთვის.
 შენ კი იხარე, იხარე ძარდა!
 შენი იესო ჯვარს ეცმის ჩვენთვის.

ბესიკი.

მატერიალიზმი. ¹⁾

(გაგრძელება.)

ამნაირათ მატერიალიზმი უძღურია აგვიხსნას სახეთა წარმოშობა ნივთიერების სამფლობელოში; უფრო ცხადათ სჩანს მისი უძღურება ადამიანის სულიერ მხარის ახსნა-განმარტებაში.

მატერიალიზმი არც კი სცდილობს სულის

ცნების განსამარტავად. — იგი პირდაპირ უარყოფს მას. მართლაც და რანაირათ უნდა მომხდარიყო, რომ ამ სამარადისო ნივთიერებას წარმოეშვა სული, რომელიც მასვე (ნივთიერებას) იკვლევს და შემდეგ ზიზლით აცხადებს, რომ იგი უშალღესია მაზე — მატერიაზე! და ამას იგი ამბობს სრული უფლებით, რადგან, რასაც იკვლევენ, ე. ი. გამოსაკვლევნი, ყოველთვის უფრო დაბლა დგას მკვლევარზე.

სარწმუნოება, სასოება და სიყვარული მატერიალისტისთვის მეტათ ძნელი ასახსნელი მა-

¹⁾ იხ. „ზინ. საქ. № 9.

ტერიის პროდუქტებია²⁾. მატერიალიზმი სიხარულით წარმოიდგენდა მას, როგორც კიდევ ქნა ერთმა ფრანკულმა, როგორც ქიმიურ შეერთებულებას, რომელსაც მყოფადი ადამიანი ლაბორატორიებში დაუწყებს მზადებას. ეს ცნებები მეტისმეტათ მოუხერხებელია მისთვის; ყველა ხალხების რელიგია (სარწმუნოება) მას ფარისეველთა გამოგონილ ხალხის გასაბრკილებელ სიმრებათ შიანია. მისი განმარტება ძალიან ღარიბია საბუთებით და სრულიად საკმარისი არ არის ისტორიული მხრით.

6,000 წლის განმავლობაში მთელი ხმელეთის ზრუგზე ჩრდილო პოლუსიდან ვიდრე სამხრეთ პოლუსამდე ადამიანი, ვინც უნდა იყოს იგი, ინდიელი თუ ესკიმოსი, გოტენტოტი თუ ტუნგუსი, ქედს იხრის ორი ძალის წინაშე, კეთილი ძალისა და ბოროტი ძალის წინაშე, რომელთა ურთიერთ შორის ბრძოლას ხედავს და გრძნობს, როგორც გარეშე ბუნებაში ისე თავის საკუთარ არსებაშიც. საიდგან დაიბადა ეს ყოველ ხალხთა შორის დიდებული, უცნობი „რალაცას“ გრძნობა; რომელიც არავის არ უხილავს და რომელსაც ყველა კი გრძნობს: „ვინ გაბედავს,— ამბობდა ჯერ კიდევ სენეკა,— თქმას, რომ ღმერთები არ ზრუნავენ ჩვენზე? განა არ ესმისთ მათ მლოცველი ხმები, განა ვერ ხედვენ იგინი ხელებს, ცათაღმი აღპრობილს“?

მატერიალიზმი ვერ გვიხსნის არა თუ მხოლოდ სიკოცხლის წარმოშობას, არამედ, სიკვდილის მოვლენასაც, რომელსაც იგი ნიეთიერ მოვლენათა რიგს აკუთნებს, ხოლო ჩვენ სულიერს.—სიკვდილი ეს ძლიერი ძალა, რომელიც სწყვეტს მთელ სიკოცხლეს, არ არის ბუნებრივი მოვლენა, იგი არაბუნებრივი მოვლენაა, რომელიც გარედგან შემოეარდნილა ცხოვრებაში. ამას მოწმობს შიში სიკვდილის წინაშე—შიში საყოველთაო ყოველი ქმნილებისათვის. თუ სიკვდილი, როგორც მატერიალისტები ამბობენ. „არის ბუნებისგან დანიშნული მიზანი ცხოვრებისა“, მაშინ სიკვდილს სრული დაკმაყოფილება უნდა მოჰქონდეს, როგორც

მიზნის მიღწევას და კიდევ სანატრელი უნდა იყოს ადამიანისათვის, როგორც სხვა ბუნებრივი მოთხოვნების დაკმაყოფილება, როგორც მაგ. შიმშილის, წყურთლის და სხ.³⁾

მაგრამ ასეთი შეხედულება სრულიად არაა სარწმუნო. სიბერით სიკვდილი ყველაფერზე უფრო არა ბუნებრივია. არც ერთ ბავშვს არ მოუვა თავში გკითხოსთ: რატომ ცოცხლობს მოხუციო? მაგრამ მას ყოველთვის შეუძლია გკითხოსთ: რატომ მოკვდა იგიო?

სრულებით შემცდარია ჩვეულებრივი წარმოდგენა, ვითომ ადამიანის სხეული სიბერეში მოცვეთილი მანქანა იყოს. ადამიანის სხეული არ არის მკვედარი მანქანა, რომელიც მოძრაობს ორთქლით ან სხვა რაიმე ძალით; იგი წარმოადგენს ორგანიზმს, რომელიც თავის შორის იპყრობს დანაკარგის აღმადგენელ ძალებს. სრულებით გაუგებარია რატომ არის, რომ ბავში, როცა ჩვეულებრივი კვებით გასაზღვრულ ჰასასკ მიაღწევს, უეტრად თავს ანებებს ზრდას, სეამს და ჰამს კი ისე, როგორც წინეთ. კიდევ უფრო გაუგებარია და აუხსნელი, რომ რამოდენიმე წლის შემდეგ ეს ბავში, რომელიც უკვე კაცად იქცა, იწყებს რღვევას, კლებას, პატარავდება და, ბოლოს, კვდება, ე. ი. მასში ჰქრება სიკოცხლის ყველა ძალები; ბუნებაში ჩვენ ხომ ერთი მაგალითიც არა გვაქვს ძალების ასე გამოღვევისა. საბუთად მოჰყავთ, ჩვეულებრივ, ძვლების გამაგრება, რომ სიბერეში იგინი ფშხენადი ხდებიან, მაგრამ ამ მოსაზრებას არ შეუძლია რამე განგვიმარტოს. სარწმუნოთ ცნობილია, რომ ადამიანის სხეული იცვლება არა თუ მხოლოდ 7 წელიწადში ერთხელ, არამედ იგი იცვლის თავის შემადგენელ ნაწილებს ყოველ სამ წელიწადში და ამასთან ნიეთიერების გაცვლა-გამოცვლა სხვა და სხვა ადამიანში და სხვადასხვა სხეულის ნაწილებში სხვადასხვა-ნაირად წარმოებს. ამასთან 75 წლის მოხუცს უკვე ის სხეული აღარ აქვს, რაც 5 წლის წინეთ ჰქონდა. რატომ არის მამ, რომ ერთი და იგივე სიკოცხლის ძალი არ იძლევა

²⁾ ნყოფი.

³⁾ კურსივი ჩვენია.

სიბერეში ისეთსავე სხეულს, როგორსაც—სიკვდილში, მიუხედავად ცხოვრების უკეთესი პირობებისა, მაგ. უკეთესათ კვებისა, ხანგრძლივი მოსვენებისა და სხეულის მეტი მოვლისა? რატომ არის, რომ, მიუხედავად მშვენიერი კვებისა, ეს სიცოცხლის ძალები უარს ამბობენ სხეულის ახალ ნივთიერებათა შექმნაზე, რატომ არის, რომ კაცი ბოლოს და ბოლოს მაინც უნდა გოკვდეს მხოლოდ სიბერის სისუსტის გამო, თითქო ძალა ან ნივთიერება, ყოველ გვარი ფოსფატი და გიდრატები⁴⁾, ბერდებოდენ?!

მატერიალიზმის თვალსაზრისით კიდევ უფრო აუხსნელია სულიერი სიკვდილი, სულის სიკვდილი, ვიდრე სხეულისა. ამ სულიერ სიკვდილს, რომელსაც თან არ სდევს არავითარი განსაკუთრებული ხორციელი ვნება, ძლიერ ხშირად გრძნობენ დამნაშავენი და ღეთის მგობარნი. სინდისის მხილებით და მყობადი ნაცვალგების შიშით დატანჯულნი, იგინი გადაჭრილათ ამტკიცებდენ, რომ აქვე, ამ დედამიწაზედვე, განიცდიან ჯოჯოხეთის წამებას; ამ ნაცვალგების მოლოდინის არსებობის უარყოფა შეუძლებელია; და აი სწორეთ ამას, სხვათა შორის, ვერ აგვიხსნის მატერიალიზმი. სასიკვდილეთ დაჭრილმა კონკვისტადორმა, რომელიც ტყვე ინდიელებით ძალებს ჰკვებავდა, თავის მხლებლის კითხვაზე: „სად გტკივაო? მიუგო: „სულშიო“! ეს მაგალითი პირდაპირ მატერიალიზმის წინააღმდეგ ლაპარაკობს. იმისვე წინააღმდეგ ლაპარაკობს მშვენიერი, მშვიდობიანი სიკვდილი ქრისტიანისა. როცა იგი კვდება, ჩვენ ყურადღებას იმდენათ თვით სიკვდილის აქტი კი არ იპყრობს, რამდენათაც სიცოცხლის ჩანელება ადამიანში იმ წუთიდან დაწყებული, როცა ადამიანი ეუბნება თავის თავს: „ეხლა მე უნდა უჩინარი შევიქნეო“! ამ დროს ადამიანის სახეზე კრთის არა ქვეყნიური ნათელი, და ხშირათ მის სიტყვებში ისმის სიმართლე არა ამის ქვეყნისაგანი. ყველა ამას უნდა ჰქონდეს თავის რეალური საფუძველი.

რამდენათაც მატერიალიზმი სუსტათ ხსნის

⁴⁾ სხეულის შემადგენელი ელემენტების სახელებია. მთარ.

სიცოცხლის აღორძინებას და სიკვდილის მოახლოებას, იმდენათვე სუსტათ ხსნის იგი ცხოვრების უბრალო ნივთიერ მოვლენებს. რანაირათ შეიძლება, მაგალითად, შესანიშნავ და ჩვეულებრივ ადამიანთა ტვინის ასე მკიროვდენი განსხვავებით აიხსნას ის დიდი განსხვავება, რომელიც არსებობს ამ ორ ადამიანთა ბედობალ შორის. მაგ. პეტრე დიდი, რომელმაც ნახევრათ ველურ ხალხებისაგან შექმნა მსოფლიო სახელმწიფო მხოლოდ თავის ძლიერი ნებით, ან ბისმარკი, რომელმაც 40 მილიონი გერმანელი აიძულა თავის პლანების განსახორციელებლათ, —ეს კაცები, რა თქმა უნდა, ისტორიულათ მილიონჯერ უფრო შესანიშნავია, ვიდრე ვინმე მეჯინიბე, რომელიც იმდენივე ტვინის პატრონია. —რაში მდგომარეობს მიზეზი ასეთი განსხვავებისა? ტვინის რაოდენობაზე ლაპარაკი აქ თითქმის შეუძლებელია, ხოლო მისი თვისების მხრით სრულიად საკმარისა არ არის ამის ასახსნელათ სახეში მივიღოთ უჯრედების ფაქიზი და წმინდა ნაშენობა, —მაგრამ შევხედოთ საგანს შორე თვალსაზრისით: რომელიმე პროვინციულ პატარა ქალაქში კვდება ვინმე მოხუცი უცოლშვილოთ გადასული კაცი. არა თუ მთელ ქვეყნიერების ცხოვრებაზე, მის ახლომახლო მეზობლების ცხოვრებაზედაც არაფერ გავლენას არ მოახდენს ეს სიკვდილი. მაგრამ აი კვდება ალექსანდრე მაკედონელი და ქვეყნიერება თითქოს დაქცევას აპირებს. მატერიალისტების შეხედულებით ორივე შემთხვევაში მოხდა ერთი და იგივე, ე. ი. ღებავრეგაცია ტვინის ნივთიერების 1200 გრ. და ადამიანის ხორცის და ძვლების 80 კილ., რომლებიც ორგანიულ შვერთებიდან არა ორგანიულში გადავიდნენ. თუ მხოლოდ ამაშია საქმის ვითარება, მაშ რაღა შუაშია აქ მთელი ქვეყნიერების შენძრევა, რომელიც ალექსანდრეს სიკვდილმა გამოიწვია?

შემდეგ, თუ მყოფობა, სიცოცხლე უდიდესი ბოროტებაა, —აზრი, რომელიც საფუძვლათ დაედვა ერთი ცნობილი მატერიალისტის მსოფლ-მხედველობას, —მაშინ ჩინგიზ—ყანი, რომელმაც 70,000 კაცის თავის კომკი ააშენა,

ტარკვემადა, რომელმაც 8,000 კაცი დასწვა კოკონზე, ან ერთი ჩინელი გერენალი, რომელიც სამი თვის განმავლობაში დღეში ათას კაცს სჭრიდა თავს, უნდა დავსახოთ კაცობრიობის უფრო მეტ კეთილის მყოფლებათ, ვიდრე, მაგალითად, ანრი დიუნანი და სხვები. მატერიალისტების თვალსაზრისით რომ დავაფასოთ გარემოება, დიდი სასჯელის ღირსია ის დედა რომელიც უფლის და პატრონობს თავის დაშავებულ რეგვენ შვილს და ამასთანავე ხშირათ თავის საკუთარ სიცოცხლეს საფრხეში ავდებს, დიდი სასჯელის ღირსია, რადგან ერთი მხრით სრულიად უსარგებლოთ აგრძელებს ტანჯვით სავსე სიცოცხლეს, ხოლო მეორე მხრით სწირავს ამ საქმეს თავის საკუთარ ჯანღონეს!

ამ ნაირათ მატერიალისტების შეხედულებებს რომ დავენდოთ, ისეთ ამოცანების ქვეყნებს დაგვიყენებს თვალწინ, რომლებსაც ვერ წარმოიდგენს ვერც ერთი ნაფიცი ქრისტიანი — მისტიკი,

მგზავრის შენიშვნები.

დასასრული.*)

ქ. ნოვოროსისკს დღეინდელი თვისი დიდი წარმატება, სიმდიდრე და ალებ-მიცემობა სულ ერთიანად ვლადიკავკასის რკინის გზამ მიანიჭა, რომელმაც დიდად ასწია მნიშვნელობა ამ ქალაქისა, როცა იგი შეუერთდა ტიხორეცკაია-ცარიცინის რკინის გზის ლიანდაგს და ამით მან დაუკავშირა ნოვოროსისკი მთელ რუსეთის მარჩენალ და მასაზრდოებელ „დედას“ მდ.ვოლღას. როცა პირველად ნოვოროსისკს მოედვა ხმა, რომ ვლადიკავკასის რკინის გზის ამხანაგობას სურს ნოვოროსისკი შეუერთოს ტიხორეცკაია-ცარიცინსა — მთელი ქალაქი სიხარულით ფეხზე აღარ იდგა, ყველას ალტაცების ჟრუანტელმა დაუარა ტანში, ყველა გაბედნიერების სურვილით იყო გატაცებული, ყველას დიდად შეუყვარდა სიცოცხლე და სამერმისო იმედებით, იდეალებით აღიჭურვა.

ამ გარემოებამ, რასაკვირველია, ერთი ათად გაუცხოველა შრომის, მოქმედების ენერ-

გია, ნიჭი და ამიერიდან იქ გაშენდა დიდი ალებ-მიცემობის ქალაქი, რომელსაც, მიუცილებლად, ყოველი მოგზაური მიაქცევს დიდსა და განსაკუთრებულს ყურადღებას. ვლადიკავკასის რკინის გზის გაყენამდის ნოვოროსისკი თითქმის რუსეთზე მოწყვეტილი იყო, მას შავი ზღვის პირად მდებარეს, თავისთვის ღრმად და სიამით ეძინა და ამ ძილს ხანდახან, ათასში ერთხელ, თუ დაახწევდა თავს მაშინ, როცა მის ნაპირს მოადგებოდა, რუსეთის სანაოსნო საზოგადოების გემი, ისიც რამდენიმე საათის განმავლობაში და, მერე, ისევ შეჩვეულ ძილს მისცემდა თავს. აღარ აწუხებდა მას, არც თავის თავზე ზრუნვა, არც სხვა ქვეყნების ამბავი, იყო და იყო იგი ერთს წერტილზე უიმედოთ გაყინული...

მაგრამ, აი, დადგა სანატრელი დროც. ვლადიკავკასის რკინის გზის ამხანაგობამ დაიწყო გზის მუშაობა, იმ წამსვე ნოვოროსისკის ქალაქის ქაობიანი ადგილები დაყვეს სამოსახლო ადგილებად, თვალის დახამხამების უმაღლვე ამოაშვრეს, მოზინეს ეს ქაობები, მაზე შევნიერი ქვითყირის სახლები წამოდგეს, გაშენდა მცხოვრებთა კარ-მიდამო, გაიყვანეს ახალ-ახალი ქუჩები, გააკეთეს მოედნები, ბაღები, გაიმართა სასტუმროები, რესტორანები, კომერციული კანტორები, საქონლის დასაწყობი ადგილები (სკლადები), დიდი და მდიდარი მაღაზიები და, ახლა, დღეინდელი ნოვოროსისკი, რომ შევეუდაროთ იმას, რაც იყო იგი ამ თუთხმეტი წლის წინათ, გასაცვიფრებელს, პირდაპირ საარაკო განსხვავებას შეამჩნევთ. და ეს სულ რკინის გზის მეოხებით მოხდა ასე.

მართალია, ნოვოროსისკის მცხოვრებლებს ყველა იმედი და მოლოდინი არ გაუშართლდა. საქმე ის არის, რომ ნოვოროსისკს ცოტა მარცხი მოუვიდა მაშინ, როცა აქ კომერციულ პორტს აკეთებდნენ. პორტის წინანდელი გეგმა შესცვალეს და იმ რთული პორტის მოთხოვნების მაგივრად, რომელსაც მოყვებოდა მრავალ-გვარი და მრავალ-ფეროვანი შენობიანი და მრავლის უმრავლესი სამუშაო საქმეები, აავსეს მხოლოდ და ააშენეს ზღვის უბეში ორი დიდი

*) იხ. „ზინ. საქ. № 9.

კედელი ნათესადგურის დასაფარავად დიდი დედისა და ქარიშხალისაგან.

მაგრამ ინჟინერის ს. ი. კერბედზის თავგამოდებულმა ენერგიამ და ვლადიკავკასის რკინის გზის ამხანაგობის მუშაობამ მიიწყო უდიდესი და უმდიდრესი ხორბლის შესანახი ბელდები, აგრეთვე გამართა კოლოსალური, გასაცვიფრებელი, დიადი ელექტორი ყოველგვარი ახალი ტექნიკურის გაუმჯობესობით და ზღვიდან მოსული გემების მარჯვედ მისადგომდაც საუცხოოდ მოაწყო ნოვოროსისკის სადგური.

ახლა ქ. ნოვოროსისკს უნდა ბათომს წაართვას ბაქოს კეროსინის ექსპორტი, რადგან ვლადიკავკასის რკინის გზამ პეტროვსკის რკინის გზის ლიანდაგით შეუერთა ბალაჯარაში კავკასიის აქეთა მხარის რკინის გზებს და პირდაპირ დერბენტზე გაატარა იგი. ამგვარად, თუ ეს იმედებიც გაუმართლდა ნოვოროსიელებს, ნოვოროსისკის ხელში იქნება ვოლდის და დონის მდიდარი აუზების პურისა და ბაქოს უმდიდრესი კეროსინის მთელი საზღვარგარეთ გატარის ექსპორტის დიდი საქმე და, რა თქმა უნდა, იგი უპირველესი პორტიც გახდება მთელ რუსეთში. აქ ახლა დიდათ აყვავებულია და განვითარებულიც მრეწველობა და ვაჭრობა ცემენტის წარმოებისა, რომელმაც გამოიწვია ზავოდების გაკეთება გელენჯიკშიაც და ნოვოროსისკი შეიქნა სავაჭრო ქალაქი. ახლად დაწესებულ შავი ზღვის გუბერნიისა...

ხომლედი.

სიტყვა მოძღვრის თვისებათა შესახებ, თქმული ვლადლად ქუართხვის დროს ბერასიძემ ხაურომის მიერ.

„სახე ექმენ მორწმუნეთა მათ სიტყვითა, სულითა, სიყვარულითა, სულითა, სარწმუნოებითა; სიწმიდითა“ (ა. ტიმ. 4 12).

შიშითა და კრძალვით მივიღებ მოძღვრის დიდსა მოვალეობასა და გულწრფელად მზად ვარ ვემსახურო ღმერთსა და შეუფუცა ჩვენსა იესო ქრისტესა, ეასწავლო წმიდა მისი

მცნებანი, მივაგო „დიდება მაღალთა შინა ღმერთსა“ და ექადაგებდე, ქვეყანასა ზედა მშვიდობას და კაცთა შორის სათნოებას (ლუკ. 2 14).

ვემზადებოდი რა ამ დიდისა სამსახურისა მისაღებად, არა ერთხელ მიფიქრნია იმა მოვალეობის შესახებ, რომელიც აძევს ეკლესიის მსახურსა; მიკითხავს და გაცენობივარ სამღვთო წერილის იმ ადგილებს, რომელნიც შეიცავენ სწავლასა მოძღვართა თვისებათა შესახებ, განსაკუთრებით გულდასმით მიკითხავს ეპისტოლენი პავლე მოციქულისა, რომელიც არა ერთგზის იძლევა დარიგებას მოძღვართა მოვალეობაზე.

ყველა დარიგება და სწავლა მოძღვართა თვისებათა შესახებ წმ. პავლე მოციქულისა შეიძლება გამოვსთქვათ მოკლეთ, მაგრამ ფრიალ ღრმა-აზროვან შემდეგო მისივე სიტყვებით: „სახე ექმენ მორწმუნეთა მათ სიტყვითა, სულითა, სიყვარულითა, სულითა, სარწმუნოებითა, სიწმიდითა. (ა. ტიმ. 4 12) და ესრეთ, პირველად, თანახმად წმ. პავლე მოციქულის სწავლისა, მოძღვარი უნდა იძლეოდეს სახესა, ანუ მაგალითსა, სიტყვისას, ე—ი, იგი უნდა იყვეს შემკული ქეშმარიტი სიტყვითა.

რას, ნიშნავს მოძღვრისათვის სახედ ყოფა სიტყვისა?

„სიტყვა“ აქ არის ნახმარი ნაცვლად საღვთო მეცნიერებისა, საღვთო წერილისა, რომელიც არის ქეშმარიტი სიტყვა ღვთისა; როდესაც წმ. მოციქული ბრძანებს, სახედ ექმენ სიტყვითა. ეს იმას ნიშნავს, რომ მოძღვარმა ზედმიწევნით უნდა იცოდეს საღვთო წერილი. ამ მხრივ მოძღვარი მუდამ ხელმძღვანელობდეს ღვთის სიტყვით, რომელიც წმიდათ არის დამარბული საღვთო წერილში და საღვთო გადამოცემაში; იოტის ოდნათაც არ უნდა გადასცდებოდეს მას მოძღვარი და განმარტვიდეს მას არა მოძღვრებითა და მცნებითა კაცთასა. (მათ. 15 9.). მხოლოდ ის მოძღვარი, რომელიც ასწავლის საღვთო ქეშმარიტებას, ხელმძღვანელობს მარტოოდენ საღვთო წერილით და განმარტავს მას მოციქულთა და დიდთა მსოფლიო მამათა მოძღვრებათა თანახმად, არის ქეშმარიტი

მოძღვარი. მხოლოდ ასეთი მოძღვარი მისცემს მორწმუნეთა სახესა, ანუ მაგალითსა სიტყვისას. მაგრამ, თუ სიტყვა მოძღვრისა არ არის გულწრფელი, თუ მას კეთილად არ ესმის სიტყვა ღვთისა, თუ ის არა ჭეშმარიტ მოძღვრებას გადასცემს და მაცდურებაში შეიყვანს მორწმუნეთა, მაშინ ის არ იქნება კეთილი მწყემსი. უკეთესია ასეთმა კიცმა უარი სთქვა მღვდლობაზე, რადგან უფალი საშინელი სასჯელის ღირსად სთვლის ცრუ მოძღვართა. იგი ბრძანებს: „რომელმან დააბრკოლოს ერთი მცირეთა ამათგანი, ჩემდა მომართ მორწმუნეთა, უმჯობეს არს მისა დამოთუიკიდოს წისკიელი ქედსა და დაინთქას იგი უფრსკულსა ზღვისასა. მათ. 18, 6.“

მეორედ სიტყვისაებრ წმ. პავლე მოციქულისა, მოძღვარი უნდა იყვეს შემკული სარწმუნოებითა.

როგორი უნდა იყვეს სარწმუნოება მოძღვრისა? წმინდა მოციქულნი უბრალო მორწმუნეთაგან, რომელთაც სწყურიათ საუკუნო ცხოვრება, მოითხოვენ სარწმუნოებას ღრმას და ცოცხალსა; თუ ასეთი უნდა იყოს სარწმუნოება საზოგადოდ ყველა მორწმუნე ქრტიანეთა, მაშინ სარწმუნოება მოძღვრისა, უნდა იყოს ფრიად გამოცდილი; სარწმუნოება მისი უნდა იყოს მტკიცე, როგორც ფოლადი; შეურყეველი, როგორც სალი კლდე, სპეტაკი, ვითარცა თოვლი.

როგორც ხორციელი ექიმი, თვინიერ ცოდნისა სწულთა ავადმყოფობისა, ვერ შესძლებს მათ განკურნებას, აგრეთვე სულიერი მოძღვარი, თვინიერ სარწმუნოებისა, ვერ შესძლებს მორწმუნეთა სულიერ უძლეურებათა დატკობას.

უნდა ვსთქვათ ამასთანვე ისიც, რომ როგორც არის სარწმუნოება ადამიანისა, ისეთივეა მისი გარეგანი ცხოვრებაც. თუ ადამიანის სარწმუნოება არის წმინდა და ჭეშმარიტი, მისი ცხოვრებაც არის სპეტაკი და სათნოიანი, რომლის მაგალითს უნდა იძლეოდეს აგრეთვე კეთილი მოძღვარი.

მესამე, წმ. მოციქული პავლე სულიერ

მოძღვართაგან მოითხოვს ქრისტიანულ სიყვარულსა.

რა არის ქრისტიანული სიყვარული?

სიყვარული ღვთაებრივი გრძობაა! იგი სულია მთელი ჭვენიერებისა! სიყვარული შემომქმედებითი ძალაა და უიმისოდ ვერცერთი ქმნილობა ვერ შესძლებდა სიცოცხლეს, სწორეთ ისე, როგორათაც შეუძლებელი იქნებოდა სიცოცხლე თვინიერ შხის სხივებისა, თვინიერ ჰაერისა. თვით ზერელე დაკვირვებაც ცხოვრებისა დაარწმუნებს ადამიანს ამაში.

თვით ღმერთი, როგორც გვასწავლის საღვთო წერილი, სიყვარული არს. (1 იოან 4, 16.)

კერძოთ, რომ ქრისტიანული სიყვარული მთავარი ძარღვია ცხოვრებისა, ამას ნათლად გვაჩვენებს თვით საღვთო წერილი, როცა გვასწავლის: „შეიყვარე უფალი ღმერთი შენი ყოვლითა გულითა შენითა, და ყოვლითა სულითა შენითა, და ყოვლითა გონებითა შენითა. ესე არს დიდი და პირველი მცნება. და მეორე მგზავსი ამისი: შეიყვარე მოყვასი შენი, ვითარცა თავი შენი. ამა ორთა მცნებათა, ბრძანებს უფალი, ყოველი სჯული და წინასწარმეტყველნი დამოკიდებულ არიან“. (მათ. 22. 36-40.) აჰა, რაოდენ დიდი და აუცილებელი ნიჭი ყოფილა სიყვარული! მაცხოვარი ყოველ ადამიანთაგან მოითხოვს სიყვარულსა.

და თუ ყოველ ქრისტიანს ვალიდ აძევს შეიყვაროს მოყვასი, ვითარცა თავი თვისი, მაშინ ამ მცნების აღსრულება უფრო შეეფერება მოძღვარს, რომელმაც, ჭეშმარიტად, არ უნდა იცოდეს „წარმართი და ურია, არამედ ყოველად ყოველსა შინა ქრისტეს“ ხედვიდეს. (კალას. 3, 11.)

და ესრეთ, მოძღვარი უნდა იყოს შემკული ჭეშმარიტი სიტყვითა, მტკიცე სარწმუნოებითა და წრფელის სიყვარულითა, რომელსაც ნუ მომაკლებ შე, ღმერთო, მარადის, რათა ღირსეულად შევასრულო ესე დიდებული მსახურება წინაშე წმიდისა შენისა ხსკურთხეველისა. ამინ.

მოწოდება.

ქართველ საზოგადოებისადმი.

ჩვენ საზოგადოებას უკვე ეუწყა, რომ განზრახულია ჩვენი დიდებული მწერლის ილია ჭავჭავაძის თხზულებათა განსაკუთრებული გამოცემა. ყველა ქართველს ესმის რა ადგილი უჭირავს დიდებულ და დაუფიწყარ ილიას ჩვენ ეროვნულ კულტურის განვითარებაში: არ მოიპოვება არც ერთი დარგი ამ კულტურისა, არ არსებობს თითქმის არც ერთი საზოგადოებრივი დაწესებულება, სადაც არ ემჩნეოდეს ილიას გავლენა, არ გამობრკვეინადეს მისი გენია, მისი კურთხეული ნიჭი. ვით ზღაპრული ბუმბერაზი, იგი სწორეთ რომ მეფობს ორმოცდაათი წლის განმავლობაში ჩვენ ეროვნულ კულტურულ შეგნება განვითარებაში, მეფობს ჩვენი ინტელიგენციის აზროვნებაში. რა მიმართულებისაც უნდა იყოს მომავალი ისტორიკოსი, რომელიც კი შეეხება მე-19 საუკ. მეორე ნახევრის ისტორიას, გაშტერდება, როდესაც თვალწინ წარმოუდგება მთელი თავის ნიჭით, გავლენით და მნიშვნელობით ის, ვინც შეჭქმნა ჩვენ ისტორიაში მთელი ხანა. ერის ცხოვრებაში იბადებიან ისეთი გმირები, რომლის ხსენების ხსენებაზე ყველას, ვისაც კი სამშობლო და მისი კულტურული აყვავება რაიმეთ მიაჩნია, გული უძგერს და ქედს იხრის. გვიახლოვდება მგონის დაბადების დღიდან 75 წლ. შესრულება და მისი ძეგლის კურთხევა. საკიროა ზედვე მოჰყვეს მისი უკუდავი ნაწარმოების ღირსეული ძეგლი, მათი შესაფერი გამოცემა.

წ. კ. გ. ს. ნება დართო ექიმ მიხ. გედევანიშვილს გამოსცეს ეს თხზულებანი შესაფერი სახით და ღირსებით. თვით გამომცემელს საქმის დაწყებისთანვე მიზნად მარტოდ მარტო ეროვნულ კულტურულ ინტერესი ჰქონდა, რის გამოც მან საკიროთ სცნო გამომცემლობისთვის საზოგადოებრივი ხასიათი მიეცა და ამ მოსაზრებით მოიწვია განსაკუთრებული სარედაქციო კომისია.

კომისიამ ითათბირა ამ გამოცემის შესახებ, საგნებით მიემხრო გამომცემლის აზრს, რომ გამომცემის მარტო კულტურული ხასიათი ჰქონდეს. კომისიამ გაითვალისწინა საქმის სირთულე და სიძნელე, აგრეთვე წიგნებისა და გასაღების მოუწყობლობა ჩვენში და, იგი მაინც იმ აზრს დაადგა, რომ ყოველგვარი ღონე და საშუალება იხმაროს და გამოცემა ღირსეული და

შესაფერი იქმნას. ჯერ-ჯერობით გამოიცემა მხოლოდ ლექსები და ბელეტრისტული ნაწარმოებნი, გარდა თარგმანებისა, სურათებით, განსაკუთრებულ ქალაღზე, ყლით. წიგნი ერთ ტომად გამოვა, ვინაიდან ზომითაც და ღირსებითაც უფრო თვალსაჩინო და შნოიანი იქნება და ფასითაც ნაკლები დაჯდება, შიგ ჩაერთობა ბიოგრაფია და მისი ნაწარმოების კრიტიკული განხილვა. რაც შეეხება ფასს კომისია იმ აზრს დაადგა რომ დაცულ იყოს ერთის მხრივ გამოცემის ღირსება და მორეს მხრივ იგი რაც შეიძლება ნაკლებ და ხელ მისაწღომ ფასათ დაეთმოს ხელის მომწერთ.

კომისიამ იქონია მხედველობაში ყოველგვარ მასალის ღირსებულობა, ითათბირა შესახებ ილუსტრაციებისა, და ერთობ წიგნის გარეგნობისა, გაითვალწინა აგრეთვე ის გარემოებაც, რომ ზოგიერთი მასალის შეძენა და საქმის აღსრულება ადვილ ბრივ შეუძლებელია და გადასწყვიტა წიგნი მიეწოდოს ხელის მომწერთ 8 მან., რა ფასიც კომისის აზრით ზომიერია. კომისია იმედოვნებს, რომ გამოცემა დასრულდება და წიგნი დარიგდება 1913 წლ. განმავლობაში.

კომისია აბა ჰმალავს, რომ ამგვარ გამოცემას დიდი შრომა და უნარი სჭირია, მაგრამ ამასთანვე იმედოვნებს, რომ ჩვენი საზოგადოება მხურვალე თანაგრძნობით მიეგებება დიდ მნიშვნელოვან საქმეს. რადგანაც განზრახულია არა მარტო უკვე დაბეჭდილი, არამედ ღუბეჭდავ ნაწარმოებების, აგრეთვე ბიოგრაფიის მოქცევა ხსენებულ წიგნში და აგრეთვე განზრახულია შემდეგ ილიას დანარჩენ ნაწარმოებთა გამოცემა, სადაც მოთავსებული იქნება სხვათა შორის ნაწარმოებების ვარიანტები.

კომისია მიმართავს ყველას, ვისაც რაიმე შესაფერი მასალა, მაგ. ილიას ნაწერები, წერილები, საბიოგრაფიო ცნობები, სურათები ნაწარმოებების ვარიანტები და სხვა, მოგპოება მიაწოდოს გამომცემელს არა უგვიანეს ამა წლის ნოემბრის პირველამდე, ვინაიდან შემდეგ გამოგზავნილით ვეღარ ისარგებლებენ.

ვთხოვთ სხვა გაზეთებსაც ეს მოწოდება გადაბეჭდონ.

კომისიის წევრნი: მიხ. გედევანიშვილი, კიტა აბაშიძე, ივ. გომართელი ივ. ხურაბიშვილი, გრ. ყიფშიძე, იაკ. ფანცხავა, ი. გედევანიშვილი.

რედაქტორი მღვდელი **სიმონ მჟავლიძე**.
გამომცემელი **იოსებ ლეჟავა**.